

scudi darli in contanti a particolari, et per le spexe dil sigilar ducati 1000, haverano *etiam* grisoni crescendo la spexa per rata. Il Maior orator dil re Christianissimo morite a Solidoro a li 14. Erano zonti alcuni de la fameia di Lamech orator de dito re. Scrive nel teritorio di Berna la secta di Anabattisti cresce continuamente, et non se li pol dar provision, nè punirli, però è sta ordinà che non predichino, ma debbano servar la sua opinion secretamente, imponendo pena de morte a quelli che fuori de caxa ne parlasseno. Heri per letere dil signor Antonio da Leva dal Ponte di Stuora se ha haver mandato el plico de letere a l'orator nostro in Spagna, per domino Diomede Caraffa gentilomo, qual va a la corte et haverà buoni recapiti. Sono letere di Zenoa, di 11, in particolari: come Antonio Doria, qual è a la guarda de Napoli, havendo ritrovato el Barbarossa corsaro, li ha tolto tre fuste et una galla. Sono letere di Barzelona, di 22 dil passato, in particular: che l'imperator non era partito, nè il Taberna per venir qui, ma partiria el dì da driedo.

*Di Franza, di sier Marin Justinian orator, da Lion, di 16 Zugno, ricevute a dì 29.* Come el Robbio orator dil duca de Milan vene a me dicendomi in gran credenza, come lo episcopo de Como nuntio pontificio a dì 13 era venuto da lui vestito a la curta, et parlatoli de lo abocamento de Niza et dil matrimonio de la neza dil Pontefice nel duca de Orlens, et che l' Papa non li dava in dota nè Parma, nè Piasenza, et che lo episcopo de Faenza era venuto per notificar la causa de la perlongation de tal abocamento, et per la dota de la neza il Papa li darà 300 over 400 milia ducati, et non di quel de la Chiesa, el qual abocamento non se farà senza volontà de Cesare.

*Dil ditto, di 17, ricevute ut supra.* Heri sera vene a cena meco el secretario dil Como nuntio pontificio, nominato domino Antonio Vicentino, el mi disse certo el Papa verà a Niza a la prima pioza de avosto, nè mai era sta parlà de darli per dota de la nepote Parma nè Piasenza, nè li daria un merlo de quel de la Chiesa. Et scrive vari colloqui auti insieme.

*Dil ditto, di 19.* La Maestà dil re tornò heri sera qui. Questa matina fu da Soa Maestà a l' ora dil pranzo, per comunicarli li sumari de Costantinopoli. Erano li tre nontii pontifici, lo episcopo de Como, lo episcopo de Faenza, domino Ubaldino sta in Anglia; et pasezando con monsignor el gran maistro udi dir a lo episcopo de Como, el Pontefice

vol far quel vuol questa Maestà, et questa Maestà quel vuol el Pontefice. Io parlai al Foresta secretario dil reverendissimo legato, qual me disse che lo abocamento sarà certo a Niza al primo fresco de avosto, dicendo dolersi che l' vedeva principio de guera et sparzer de sangue, dicendo, se ben el Papa darà terre al re, poi morto non sarà nula. El duca de Orlens ha anni 14, ha uno poco de mal a uno ochio, ma non de pericolo. Da poi monsignor el gran maistro me chiamò, al qual comunicai li sumarii. Disse esser letere de Scotia, di 12 de questo, portate per Flori valletto de camera: come le trieve erano fate tra el re de Anglia et esso de Scotia, et che li oratori de l' uno et l' altro doveano esser a uno locho chiamato Castelnovo, dentro de Anglia lige 20, dove se publicherà le trieve et se parlerà di le loro controversie, qual tutte è stà rimesse a questa Christianissima Maestà; et le noze dil re de Scotia in la fia dil re de Datia, nepote de l' imperator non se farà. Et disse questo episcopo de Faenza venuto ha portato lo abocamento dil Pontefice a Niza sarà a mezo avosto; et li dimandai: l' imperador che diselo de questo? rispose non saper. Et li dimandai quel faria l' armata dil Doria? rispose non saper. Da poi mi apresetai al re, poi disnato, et li comunicai li avisi, ringratiò et disse, le trieve de Scotia è per uno anno, et il matrimonio de la fia dil re de Dazia non haverà locho, et lo abocamento de Niza sarà questo avosto. Visitai eri l' orator cesareo, et *etiam* mi disse li nontii pontifici esser stati da lui et nulla li haveano ditto, ma *solum* de lo abocamento, qual io li dissi quanto me havea dito el re Christianissimo. Ho parlato con Flori, tornato de Anglia, me ha confirmà *ut supra*, qual laudò molto domino Carlo Capello orator nostro et la regina esser stà incoronà a li 29 dil passato. Ho inteso mercedanti zenoesi soliti negotiar qui a Lion et hora negociano in Monlovelo terra dil duca de Savoia, praticano de ritornar come prima qui in Lion, et si ben loro patiscono, *etiam* questa Maestà ha de danno a l' anno scudi 12 milia de dazi et dreti che i pagavano. Questa Maestà partirà de qui poi el dì de S. Zuane, anderà in Avergne a un vodo fato a Nostra Dama de Pyri, viazo difficilimo, montuosissimo et sterilissimo con una insuportabil carestia, poi andarà a Tolosa et in Lenguaadoca, lochi de malissimo aere, viazo tanto quanto è de qui a Paris. Et Soa Maestà vol esser per la prima settimana de avosto in Avignon, sarà *etiam* la serenissima regina et tute altre dame, ma anderano per via più facile.